

中華文史叢書之四十五
清、道光十三年刊本影印
王有立主編

楊忠烈公集

(一)

明、楊 漣撰

華文書局股份有限公司印行

道光十三年重鐫

楊忠愍公文集

世美堂藏板

恭錄

高宗純皇帝

命皇子等編輯明臣奏議

諭歷代名臣奏疏向有流傳選刻之本四庫全書內亦經
館臣編次進呈其中危言讜論關係前代得失者固
可援為法戒因思勝國去今尤近三百年中蓋臣傑
士風節偉著者實不乏人跡其規陳治亂抗疏批鱗
當亦不亞漢唐宋元諸臣而奏疏未有專本使當年
繩愆糾謬忠君愛國之忱後世無由想見誠闕典也

即或其人品誼未醇而其言一事陳一弊切中利病
有裨時政者亦不可以人廢言至神宗以後諸臣奏
疏內有因遼瀋用兵涉及本朝之處彼時主闇政昏
太阿倒置閹人竊柄權倖滿朝以致舉錯失當賞罰
不明其君綴旒於上竟置國是若罔聞遂至流寇四
起兵潰餉絕種種糝政指不勝數若楊漣左光斗熊
廷弼諸人或折衝疆場或正色立朝俱能慷慨建議
剴切敢陳設明之君果能採而用之猶不致敗亡若
是之極其事距今百十餘年殷鑒不遠尤當引為炯

戒則諸人奏疏不可不亟為輯錄也除明史本傳外
所有入四庫全書諸人文集均當廣為蒐採裒集成
編即有遺礙字句祇須畧為節潤仍將全文錄入不
可刪改此事關係明季之所以亡與我朝之所以興
敬怠之分天人之際不可不深思遠慮觸目警心著
派諸皇子同總師傅蔡新等為總裁其皇孫皇曾孫
之師傅翰林等即著為纂修校錄陸續進呈候朕親
裁書成後即交武英殿刊刻仍抄入四庫全書將此
旨冠於簡端所有前次紀昀等選出神宗以後各奏

疏即著歸入此書按其朝代一體編纂此諭

廷試孝廉方正山東博平縣知縣臣楊祖憲敬錄

乾隆丁丑年

高宗純皇帝御製閱楊連劾魏忠賢二十四大罪疏文

自古寺宦之亂人家國者多矣其始未嘗不為小忠
小信以結人主之知使外言不得而入人主信之不
疑然後攬權肆虐無復忌憚而君上之操柄失矣縱
復疾其所為欲引外廷之助以除之而近在肘腋禍
起蕭牆望夷之事甘露之變良可寒心予讀楊連劾
魏忠賢二十四大罪疏而知其不為趙高仇士良之
所為者亦幾希耳而熹宗略不加省專意庇璫吾以

為熹宗之黷直甚於彼二主耳蓋二世文宗猶能知其為不善而欲去之熹宗則始終信任之靡他且囑懷宗以信任忠賢吁惑之甚矣然使熹宗而有欲去忠賢之心忠賢其遂甘心以受熹宗之斥哉是知人主不可不延納賢良以自為助而宵人在側附者如蟻大權已歸雖欲去之其可得乎故熹宗之用忠賢也王心一首言之侯震暘繼言之周宗建又繼言之文震孟因講學之疏而直陳其奸劉之鳳因內操之疏而指其不測至楊漣二十四罪之疏上而忠賢之

奸佞畢露蓋不可一日而容於天地之間矣使熹宗
觀此疏而赫然震怒大振乾綱申春秋無將之誅比
漢法不道之律則忠賢之羽翼猶未成而忠賢之流
禍固亦未甚酷也至楊漣左光斗輩駢首被戮而毒
流縉紳元氣凋喪余謂有明之亡不亡於崇禎之有
流賊而亡於天啓之用魏璫然則楊漣此疏明室存
亡之所繫也而不用且加誅焉甚矣熹宗之黷也
廷試孝廉方正山東博平縣知縣臣楊祖憲敬錄

序

自昔忠直之臣為人所不能為言人所不敢言至誠本於性生矢志彌堅遭禍愈烈得失利害之見泯於中又安計其文章聲譽之傳於後世貽厥子孫哉然其艱貞果毅之氣間世而生歷久不敝英靈振河嶽節義貫古今雖片語單詞一歌一咏奕世而下斯愛斯傳況其危言讜論正色抗爭有關於國家之大者乎應山楊忠烈公當主少國疑之際適奸璫竊柄之時以給諫親承顧命爭封后之非主移宮之速志安社稷慷慨激昂固不

僅以剴切陳詞博諍諫之名也迨二十四罪之疏直指
璫逆而言出禍隨丹血晨埋沙囊夜墜士君子讀史至
此未嘗不歎息痛恨於泰昌天啟間也余於嘉慶己卯
歲視學楚北次年春按試德郡求公之遺集猶有存者
今其裔孫祖憲採輯遺文重加編訂將以付梓屬余為
序余以公之文章氣節昭若日星當明思宗時雪竒冤
闡幽憤隆禋祀之儀進易名之典卹贈攸加亦云厚矣
至我

朝

褒揚忠節特立祠宇並與春秋祀典尤從末所未有即

前賢表章遺蹟言之綦詳余不文敢復為贅述以貽謗
陋譏顧余聞公少讀書時與其兄清慕同邑二宋二連
名相與砥厲名節公以進士除江蘇常熟知縣舉廉吏
第一擢給事中公之令子之易於

國初官松江府司馬死叛臣吳勝兆之難公冢孫苞宰上
林洛陽桐川諸邑任廣德州刺史循聲卓卓元孫可鏡
在郎署時清名奕奕不墜家風亦足見忠貞之所遺者
遠矣茲祖憲以徵士蒙

恩簡用山東博平縣令出而膺民社之責必能善承先志

行將以吏治報

國無負

朝廷選舉

曠典正不徒以蒐輯遺文揚先人之清芬已也

賜進士出身巡撫湖北等處地方事務前湖北學政光祿寺卿太常寺卿稽察左翼宗學都察院左副都御史禮部左右侍郎兼署湖廣總督六安後學楊懌曾頓首撰

序

嗚呼光熹之際明事之壞極矣其君子危言激論其小人乘間抵巇造閣宦擅權衆小人爭投門下稱義子且借邊事以鋤正士而諸君子皆死詔獄其爭移宮翼熹廟有大功於社稷若忠烈楊公者亦以拷掠斃獄中蓋漢誅黨錮唐戮清流未有若斯之慘酷者公應山人也大節具載明史雖廝養童稚無不知公名當光宗不豫時選侍據宮邀封輔臣怯懦持兩端微公則熹廟幾不得立逆閹用事公首劾其二十四大罪閹銜之欲寘之

死遂羅織之公及諸君子死而明遂亡矣

贈芳

幼讀明

史慕公大節誦公所上疏如見對仗彈奏時然以不獲
覩公集為憾道光五年視學楚北訪其後人求遺集時
公八世孫楊君祖憲以學行世其家舉制科高等讀公
之文又竊幸忠良之有後也又五年

贈芳

以諫垣出守

適楊君謁選為宰同官於齊因哀遺集索序謹按公集
在明時僅遺稿二編為公嗣子之易手錄厥後一編於
直指李公再編於學使者茹公搜羅散軼增其卷帙刻
之者公冢孫苞及七世孫徵策也楊君在京都又從鄉